


hódni synowje! Wobkhowajmy našu narodnosć, mějmy zańc maćeřnu ryč, a zaspěwajmy jenomyslne: Trać dyrbi Serbstwo, zawostać! atd.“

M. Hórnik.



Nowe wustawki Maćicy Serbskeje.

W léce 1847 z dowolnosću sakskeho a kralowskeho pruskeho knježerstwa pod mjenom „Maćica Serbska“ założene serbske literarne towařstwo, kotrež po statuće wot 3. hapryla 1872 pod tym samym pomjenowanjom jako zapisane towařnistwo z wobmjezowanej zawjaznosću wobsteji, je wosebiće dla swojeho z pohladom na kupjenje ležownosće dokonjaneho přestworjenja tute z nowa přehladane wustawki postajilo.

§ 1. Mjeno.

Towařnistwo wukonja prawa juristiskeje wosoby pod mjenom „Maćica Serbska“.

§ 2. Sydło.

Wone ma swoje sydło w Budyšinje.

§ 3. Wotpohlad.

Jeho wotpohlad je: z wudawanjom dobrych ludowych a wědomostnych serbskich spisow, kaž tež wědomostneho časopisa za zdźělanosć serbskeho luda po móžnosći so starać.

§ 4. Sobustawy.

Towařnistwo wobsteji: 1) z rjadnych, 2) z wurjadnych, a 3) z čestnych sobustawow.

Ad 1. Jako rjadny sobustaw móže kóždy nad sobu rozkazowacy, samostatny, w němskim khěžorstwje bydlacy, bjezporočny, serbskeje ryče mócný mužski być.

Ad 2. Za wurjadne sobustawy plaća či, kotřiž druhej narodnosći přisłušeja abo we wukraju bydla. Tehorunja móža tež žónske wurjadne sobustawy być.

Ad 3. Za čestne sobustawy móža so mužowje pomjenować, kotřiž su sebi wuznamne zaslužby wo towařstwo abo wo zdźělanosć serbskeho luda dobyli, njech w kraju abo we wukraju bydla.